

TOK TOK KAM LONG MP, MINISTA HONORABLE JASON PETER



Gutpla Meri Krismas long yupela olgeta pipol blo mi long Huon Gulf distrik husat yupela stap insait long tri-pela lokol levul gavman kansol eria blo yumi, Wampar, Salamaua, na Morobe long nem blo Anutu.

Anutu yet i ken kisim bik nem na glori long wanem kain ol wok na sevis yumi laik wokim na tu deliverim long ol wan wan ples wod kansol eria blo yumi long peles.

Dispela buk mipela i mekim, em long soim o luksave long ol moni bilong yumi kam long District Services Improvement Program (DSIP) fund we Huon Gulf District Development (HGDDA) ananit long lidasip blo mi i bin basetim na burukim long kamapim wok developmen na deliverim sevis igo daun long wan wan wod eria na LLG bilong yumi.

Bikpela tinting na driman bilong mi taim yupela i makim mi kamap memba, mi laik lukim gavman sevis igo insait long ol ples blo yumi. Long dispela ass tingting mi kamap wantaim tinting long usim dispela gavman polisi ol i kolim "Bottom-UP- Plan". Mi gat bikpela bilip olsem bihainim dispela polisi yumi ken lukim ol sevis na developmen kamap. long ol ples bilong yumi.

Dispela polisi em i toktok long sevis deliveri o wok developmen stat daun long ol wanwan wod eria na LLG bilong yumi.

Long dispela ass tingting, HGDDA i burukim ol DSIP moni na givim igo long olgeta 65 wod kansol na tri-pela kansol presiden bilong yumi long Wampar, Salamaua na Morobe long mekim ol wok.

Mi laik lukim driman bilong mi karim kaikai we Huon Gulf Distrik i ken kamap olsem wampela "Morning Star" niupela distrik we ol manmeri i ken kamapim gutpela sindaun wantaim nupela laif stail.

Moni mak HGDDA i bin komitim na burukim em i olsem, K1 million igo long tripela LLG presiden na K100, 000 long olgeta 65 wod kansol.

Dispela moni em ol Presiden na kansol i usim long wokim ol wok projek long wanwan hap wod bilong ol.

Mi bilip yupela i lukim pinis sampela wok developmen o sevis i wok long kamap insait long wanwan ples wod bilong yupela.

Dispela buk bai soim klia ol wok we i bin kamap pinis o ino pinis yet. Bai yupela i ken ridim na kisim klia tingting long wanem ol projek kansol blo yu i mekim kamap long wanwan wod eria blong yupela long peles.

Long pinisim toktok, mi laik tok bikpela tenk yu igo long HGDDA membass, LLG presiden, ol wod kansol, CEO blo distrik Andrew Namuesh wantaim ol wokman bilong em olsem ol program manesa (sektu het) na tu long Tim JP long gutpela sapot yupela givim long mekim kamap ol wok bihainim driman bilong mi. Yumi olgeta ken wok bung wantaim na senisim distrik bilong yumi olsem wampela "Morning Star" niupela distrik we sevis i ken kamap na senisim sindaun blo ol pipol blo yumi long wod eria, LLG na distrik tu.

Mi tu laik tok tenk yu igo long ol Media Tim bilong yumi long kamapim dispela magazine o buk, dispela em nambawan taim yumi bai lukim ol dispela kain ripot long distrik bilong yumi

HG distrik i ken kamap olsem wampela modol distrik insait long Morobe na tu PNG wantaim ol sevis na developmen i kamap na bai kamap bihain.

Anutu ken kisim Biknem na Glori long wanem kain wok na sevis yumi mekim nau na bai mekim bihain. Gutpela amamas blo Krismas long yupela olgeta – Anutu Bless

Honorable Jason Peter
Membass Huon Gulf Distrik